



UNIVERSITÄTS-
BIBLIOTHEK
PADERBORN

**Bellum Sacrum Ecclesiae Militantis Contra Turcum
Communem Hostem Christianorum**

Vaux, Léonard de

Leodii, 1685

Pars Altera Belli Sacri: Continens quatuor Exercitia militaria, Christianæ
Pietatis, ad omnia utilis.

[urn:nbn:de:hbz:466:1-64991](https://nbn-resolving.org/urn:nbn:de:hbz:466:1-64991)

servient, faciendo quod non possunt
facere nisi Reges, sic populis divina
auxilia, sibi ipsis æternam Gloriæ co-
rona merebuntur.



PARS ALTERA
BELLISACRI:

*Continens quatuor Exercitia militaria,
Christiana Pietatis, ad
omnia utilis.*

IESUS-CHRISTUS, Deus-
Homo, Rex Regum, Do-
minus dominantium, sum-
mus omnium Judex & Im-
perator noster omnes Christianos, in
ejus Sanguine renatos, in ejus fide
confirmatos, Corporis sui Eucharisti-
ci cibo confortatos, ad Bellum Sacrum
perpetuò convocat; dicens venite ad
me omnes: si quis vult post me venire
abneget semetipsum, tollat crucem
suam quotidie, & sequatur me. Qui
vicerit faciam illum sedere mecum in
throno meo, sicut & ego vici & sedeo
cum Patre meo in throno ejus. Qui

habet aurem audiat, quid Spiritus dicat Ecclesiis: id est, omnibus fidelibus renatis, in Sanguine Christi JESU, quem oportuit pati, & ita intrare in gloriam suam. Si ergo ipsum Regem gloriæ oportuit esse in laboribus & doloribus, à juventute sua, perpetuò certare, & præliari contra Dei inimicos usque ad mortem crucis; quantò magis omnes, milites ejus, omnes omninò fideles, Reges, Principes, populi omnes qui Christiano Nomine gloriantur, sub vexillo Crucis militare debent, militiam bonam. Omnes igitur, accipiant, quotidie armaturam Dei, cum quâ Dei gratiâ roborante infirmitatem humanam, legitimè certando usque in finem vitæ hujus mortalis, & momentaneæ, digni erunt accipere coronam justitiæ; quam reddet in illa die justus Judex, Rex Regum Christus JESUS, omnibus victoribus suis, qui diligant gloriosum adventum Domini sui, à quo unusquisque recipiet, secundum merita sua.

PRIMUM EXERCITIUM
MILITARE CHRISTIANÆ
PIETATIS.

Quinque precipua capita doctrinae Evangelica, omnibus Christi militibus proposita, ut illa fideliter exequentes, Deo auxiliatore, aeternae vitae coronam mereantur accipere.

§. I.

EVANGELIUM JESU CHRISTI, prædicatum ab Apostolis, in universo mundo: & traditum ab ipso met Christo, Ecclesiae suæ militanti, quam acquisivit Sanguine suo; ut sit omnium fidelium Mater & Magistra veritatis: His quinque practicis principiis comprehenditur; videlicet:

1. Credere credenda.
2. Recipere recipienda.
3. Petere petenda.
4. Facere facienda.
5. Expectare expectanda.

Hoc est summarium Doctrinæ

Evangelicæ, ab initio mundi absconditæ sapientibus & prudentibus sæculi hujus tenebrofi in maligno positi; & revelatæ parvulis, humilibus corde, ab ipsomet unigenito Dei Filio Incarnato, in sinu humillimæ, piissimæ, & Sanctissimæ Virginis, Dei Genitricis MARIÆ, Matris omnium fidelium.

I. V E R B U M.

Credere credenda.

Fides est sperandarum substantia rerum, argumentum non apparentium. Sine fide divinâ impossibile est accedere ad Deum, & Deo placere; Symbolum Apostolicum, quod Sancta Romana Ecclesia; à Principe Apostolorum, Beato Petro, & coapostolis ejus acceptum, fidelibus tradit, est summarium credendorum. Inter Symboli Apostolorum articulos, tria sunt mysteria præcipua, ab omnibus Christianis explicitè & firmissimè credenda, tanquam omnium credendorum in particulari fundamen-

ta & firmamenta: nimirum mysterium Sanctissimæ Trinitatis, in unitate Divinitatis, Pater, Filius, & Spiritus Sanctus; tres Divinæ Personæ unus Deus optimus maximus, justus; sapiens, omnipotens, Creator omnium, Deus unus, trinus, Principium & finis omnium, visibilem & invisibilem: hoc est primum & maximum mysterium fidei, quod vocatur Majestas Divinitatis. Secundum est mysterium Incarnationis Verbi Dei, quod est magnum pietatis Sacramentum, Deus-Homo, unigenitus Dei Filius, exinanitus, Crucifixus, factus Homo, ut homines Divinitatis suæ tribueret esse participes, Mediator Dei & hominum; non est in alio aliquo salus. Trinitas Divinâ est Principium, & finis credendorum: Verbum Increatum & Incarnatum, **JESUS-CHRISTUS** Deus-Homo est medium, per quod Deo, uni, trino, unimur, & reconciliamur, ut per ejus gratiam, salutem Æternam, id est, perfectam felicitatem, in possessione Divinæ Trinitatis consequamur. Tertium est Ecclesia Dei vivi, columna & firmamentum

veritatis, per quam accepimus symbo-
 lum, sive regulam credendorum, ipsum
 Evangelium Christi, Ecclesiæ tradi-
 tum & revelatum. Quomodo enim
 possemus certò scire hoc esse verum
 symbolum, & verum Christi Evan-
 gelium, & omnia hæc credenda my-
 steria; nisi nos in illâ fide, Ecclesiæ
 Catholicæ confirmaret auctoritas, in-
 numeris miraculis à Deo glorificata?
 Extra hanc Ecclesiam non est veritas
 fidei divinæ, non est vera justitia, nec
 vera salus. Ecclesia, ista auctoritate
 Dei veri, vivi, optimi, maximi, omni-
 potentis, necessariò per se existentis,
 infinitè perfecti, fundata, est una, Chri-
 stiana, Catholica, Apostolica, & Ro-
 mana, quæ usque ad finem mundi
 est permanens: supra Cathedram Bea-
 ti Petri, ab ipsomet Christo stabilita,
 & exaltata, tanquam supra montem
 omnium oculis exposita, ad quam om-
 nes, ex universo mundo nationes con-
 fluere possunt; & contra quam portæ
 inferi error & iniquitas, huc usque
 prævalere non potuerunt: nec un-
 quam prævalebunt, secundùm Christi
 promissionem, qui cum sit ipsa veri-

tas, nec falli potest, nec fallere.

Hæc est fides Catholica & Romana, quam nisi quisque integram, & inviolatam servaverit, in æternum peribit. Utinam ô Divina Trinitas, hanc fidem à Beato Petro, & ejus successoribus nobis traditam, omnes quotquot sumus Christiani Catholici, Romanæ Ecclesiæ Filii, extra quam non est salus, totius sanguinis effusione, sicut fecerunt innumeri Sancti Martyres, signare & confirmare per gratiam, & cum gratia JESU-CHRISTI, valeamus & mereamur. Amen.

I I. V E R B U M.

Recipere recipienda.

Sacramenta JESU-CHRISTI Ecclesiæ sponsæ suæ, tradita ab ipsomet Deo-Homine, sunt signa visibilia invisibilis gratiæ, non solum significativa, sed etiam effectiva, in illis, qui ea ut oportet recipiunt. Ex septem Christi Sacramentis Baptismus, qui est omnium primus in ordine receptionis, est Sacramen-

tum regenerationis, contra originale
 peccatum; à Christo institutum, ut
 per invocationem Sanctissimæ Trini-
 tatis, & per aquam, & Spiritus Sancti
 communicationem, renascamur ad vi-
 tam æternam: unde post promulga-
 tum Evangelium, est omnibus neces-
 sarius Baptismus, ut Christo uniamur
 sicut membra viva, capiti vivificanti.
 Sacramentum Pœnitentiæ, est insti-
 tutum contra peccata, propria volun-
 tate contracta, post Baptismum. Sa-
 cramentum verò Eucharistiæ, est in-
 stitutum à Christo tanquam omnium,
 potissimum, maximum & divinissimum,
 ut in JESUM transformemur, & ipse
 sit vita nostra, per arctissimam, ac
 perfectissimam cum illo unionem:
 undè meritò vocatur à Sanctis Patri-
 bus, extensio Incarnationis. Est au-
 tem Eucharistia, non solum omnium
 Sacramentorum maximum, sed etiam
 maximum Sacrificium incruentum,
 Divinæ Trinitati infinite gloriosum,
 & acceptum, & toti Ecclesiæ trium-
 phanti in Coelis, militanti in terris,
 & patienti in ignibus Purgatoriis, sum-
 mè gratum, & salutare; atque omnibus

infernæ portis formidandum. Tres sunt præcipui effectus Eucharisticæ communionis, seu fructus uberrimi, quibus abundantissimè cumulantur, qui illam frequenter, & piè recipiunt: scilicet per illam Communionem Spiritualem simul & Sacramentalem, liberantur fideles à peccatis quotidianis, & à mortalibus præservantur. 2. In charitate, gratiâ & aliis virtutibus, illi annexis crescunt, roborantur & perficiuntur, tantò magis, quò frequentius illam recipiunt, cum dispositionibus necessariis, & sufficientibus. 3. Denique disponuntur proximè ad ultimum certamen decretorium æternitatis singulorum, ad mortem pretiosam, in conspectu Domini, per quam in vitam æternam introducuntur, est enim Eucharistia cœlestis antidotum contra peccata mortalia, cibus grandiu, & viaticum in Domino morientium. Nullum ergo Christianis omnibus dari potest salutarius consilium, quam sic vitam moresque suos secundum Christi Evangelium componere; ut si sint Sacerdotes, quotidie merito celebrare: si non, communicare possint.

III. V E R B U M.

Petere petenda.

Nihil frequentius commendavit Christus suis Discipulis, & consequenter nobis, & omnibus qui in illum credituri erant, quàm perpetuam vigilantiam super vias nostras, supra nos ipsos, & perseverantem orationem; qua omnia majora Dei auxilia, per Christum obtinent Christiani, qui illum orant mente, & spiritu: non tantùm verbis. Omnium orationum præstantissima est, illa quam Christus ipse primus obtulit Patri & docuit Discipulos suos, continet enim expressè omnia, quæ à Deo optimo petere debemus; ad nostram purificationem, illuminationem, sanctificationem & salutem Æternam.

Prima enim pars hujus orationis Domini nostri, exprimit quatuor petitionibus, summa bona, quæ humiliter à Deo optimo flagitare debemus. Secunda pars, tribus petitionibus, summa illa mala proponit: à quibus liberari

postulamus; ut mundi simus à peccato; Deo grati, Sancti, & Beati. Hæc sunt quæ Filios Dei militantes in terris, petere quotidie oportet, à Patre suo cœlesti, per **JESUM-CHRISTUM**, Salvatorem nostrum; cujus salutaribus monitis, & divina institutione formati, audemus dicere: **Pater noster.**

Post illam Orationem Dominicam, Sancta Catholica & Romana Ecclesia, docet nos Salutationem Angelicam: quæ est perfectissima oratio qua Deiparam possumus, congruis titulis honorare & deprecari, ut sit nobis propitia apud Deum. Eadem Ecclesia à Spiritu Sancto edocta omnem veritatem & pietatem, plurimas in Officio Divino Orationes, tribus Divinis Personis, quotidie offert: pro sanctificatione suorum filiorum, præsertim, in Sacrificio Missæ: quæ omnes preces, sunt effusiones ex Oratione Dominicâ emanantes.

IV. VER.

I V. V E R B U M.

Facere facienda.

DEclina à malo peccati timore,
 Dei tui, & fac bonum amore
 ejus, qui prior dilexit te: Bo-
 nus eris, & Beatus in Deo tuo: qui
 cum sit optimus omnem iniquitatem,
 odio habet; & diligit justitiam & æqui-
 tatem: peccatum est iniquitas, om-
 nium malorum aliorum, corporis &
 animæ origo & causa: amor Dei est,
 æquitas ipsa, omnium bonorum fons
 cœlestis; nihil tam malum ac pec-
 catum, quo animâ à Deo suo
 separatur. Nil sic ama ac Deum
 tuum, cætera propter ipsum, dili-
 ge Dominum Deum tuum ex toto,
 propter ipsum super omnia, & proxi-
 mum sicut teipsum propter Deum, si-
 cut Christus dilexit nos; in his duo-
 bus, continentur omnia facienda, qui
 sic diligit, omnem legem implet, quia
 perfecta dilectio est omnis legis pleni-
 tudo, omnia præcepta decalogi: &
 quæ ad receptionem Sacramentorum,

T

ac orationis exercitium, spectant omnia Christi consilia, omnia Ecclesie Christi mandata & Christianæ pietatis exercitia, ab his duobus mandatis procedunt: & ad illa referuntur, ut securius, constantius, & perfectius observentur; unde his recensitis, adjecit Christus, hoc fac & vives: id est, sapiens, justus, & beatus eris in Deo tuo.

Perfectus amor Dei, & proximi in Deo usque ad contemptum nostri, id est, veteris hominis cum actionibus suis, hæc est consummata justitia Christiani in statu viæ constituti. Hanc ideo dilectionem, vocat Paulus vinculum perfectionis: id est, perfectæ actionis, quâ Deo arctissimè uniuntur viatores: sed non erit omninò absoluta, nisi in statu comprehensoris, quando Deum videntes, sicut in se est, sic ex toto diligemus, & illi inhærebimus, tam fortiter ac suaviter, ut nulla omninò creatura possit, nos ab ejus amore separare. Cæterùm ad hanc perfectionis Christianæ metam, tendere sic debemus, ut illam tandem Deo adivante comprehendamus, in tempore enim inutiliter vivitur, nisi ut acquiratur

meritum, & de virtute, in virtutem
crescatur, quo in Beatâ Æternitate,
eò gloriosius & beatus vivatur, quò
Deus, & proximus in Deo amato ar-
dentius diligitur.

V. VERBUM.

Expectare expectanda.


BEati, qui sic timent à judiciis
Dei, ut quotidie ad gloriosum
omnium Judicis adventum, se
præparantes: diligant & expectent
illum venientem, cum potestate ma-
gnâ & majestate. Omnes Christi mili-
tes, qui in Christum JESUM credi-
derunt, in ipso renati sunt: magno
ejus Sacramento, cibo grandium, ro-
borati sunt, nomen ejus invocaverunt,
peccatum odio habuerunt, divinæ ejus
mandata servaverunt, & legitimè cer-
taverunt: quid aliud desiderare, &
expectare ab optimo, & potentissimo
remuneratore possunt, nisi coronam
illam justitiæ consummatæ, quam red-
det in illa die justus Judex, omnibus
qui diligunt adventum ejus gloriosum?

T 2

Tria igitur quotidie expectare debent magnanimi milites Christi: qui per arma lucis, præliantur prælium Domini, cum lætitia, dilectione, & sancto timore vigilantes, orantes, perseverantes in certamine: videlicet prætiosam mortem in conspectu Domini: gloriosam Resurrectionem, in die iudicii, possessionem æternam à dextris Imperatoris sui post elogium illud magnificum, ex ore Altissimi: Venite milites mei magnanimi, vos estis qui permanistis mecum in tentationibus, in laboribus, in periculis, in præliis meis, usque in finem: Venite benedicti Patris mei, possidete paratum vobis regnum à constitutione mundi: vicistis malignum, gratiam meam in vacuum non accepistis, bonum certamen certastis, cursum consummastis, fidem servastis, Evangelium meum non erubuitis, crucem vestram quotidie portastis, me Regem & Salvatorem vestrum, per arctam viam secuti estis; coram hominibus meum nomen confessi estis, fortiter in Bello contra inimicos meos dimicastis, de omnibus, me adjuvante triumphastis, venite

ergo amici mei, sedete mecum in throno meo: sicut & ego vici, & sedeo cum Patre meo in throno ejus, vos estis regnum meum, & corona gloriæ meæ, manete mecum in regno meo in Æternum, quiescite modo à laboribus vestris, in sinu divinitatis meæ. Ecce ego, Pater & Spiritus Sanctus; qui tres unum sumus unus Deus, erimus omnia, in vobis omnibus.

SEX ALÆ SPIRITUALIUM
CHRISTIANORUM.

1.  Rede in Deum, unum, trinum, Creatorem tuum: & **J E S U M - C H R I S T U M** Deum-Hominem, Salvatorem tuum.
2. Dilige Deum tuum super omnia, & proximum tuum in Deo sicut te ipsum.
3. Declina à peccato timore Dei, & fac bonum imperatum amore Dei tui.
4. Aperi os tuum in laudes Dei tui, & invoca nomen ejus in auxilium tuum.
5. Recipe Sacramenta instituta à


Domino JESU Salvatore tuo, tanquam gratiarum illius fontes perpetuos.

6. Et sic Dei gratiæ cooperari fatage, ut semper sis paratus, de hac mortalitate exire: cupiens dissolvi, ut videas facie ad faciem Deum cordis tui.

S Y M B O L U M
SANCTI ATHANASII.

Præcipua fidei Catholica Mysteria explicans, auctoritate summi Pontificis Romani approbatum, ad quem pertinet fidei Symbolum, sive regulam ordinare; Concilia congregare, approbare, aut dissolvere: sicut & omnia alia, quæ spectant, ad regimen totius Ecclesiæ militantis: cujus ipse solus, est unicum Caput visibile, ab ipso Christo constitutum, ut omnes confirmet.

§. I.

1.  Uicumque vult salvus esse, ante omnia opus est ut teneat Catholicam fidem.

2. Quam nisi quisque integram in

violatamque servaverit, absque dubio
in æternum peribit.

3. Fides autem Catholica, hæc est
ut unum Deum in Trinitate, & Tri-
nitatem in unitate veneremur.

4. Neque confundentes Personas,
neque substantiam separantes.

5. Alia est enim Persona Patris, alia
Filii, alia Spiritus Sancti.

6. Sed Patris, & Filii, & Spiritus
Sancti, una est Divinitas: æqualis
gloria coæterna Majestas.

7. Qualis Pater, talis Filius, talis
Spiritus Sanctus.

8. Increatus Pater, increatus Filius,
increatus Spiritus Sanctus.

9. Immensus Pater, immensus Fi-
lius, immensus Spiritus Sanctus.

10. Æternus Pater, æternus Fi-
lius, æternus Spiritus Sanctus.

11. Et tamen non tres æterni, sed
unus æternus.

12. Sicut non tres increati, nec tres
immensi; sed unus increatus, & unus
immensus.

13. Similiter omnipotens Pater, om-
nipotens Filius, omnipotens Spiritus
Sanctus.

14. Et tamen non tres omnipotentes, sed unus omnipotens.

15. Ita Deus Pater, Deus Filius, Deus Spiritus Sanctus.

16. Et tamen non tres dii, sed unus est Deus.

17. Ita Dominus Pater, Dominus Filius, Dominus Spiritus Sanctus.

18. Et tamen non tres Domini, sed unus est Dominus.

19. Quia sicut sigillatim unamquamque Personam, Deum ac Dominum confiteri Christianâ Religione compellimur: ita tres Deos, aut Dominos dicere, Catholicâ Religione prohibemur.

20. Pater à nullo est factus, nec creatus, nec genitus.

21. Filius à Patre solo est, non factus, nec creatus, sed genitus.

22. Spiritus Sanctus, à Patre & Filio, non factus, nec creatus, nec genitus, sed procedens.

23. Unus ergo Pater, non tres Patres, unus Filius, non tres Filii, unus Spiritus Sanctus, non tres Spiritus Sancti.

24. Et in hac Trinitate, nihil prius

aut posterius, nihil majus, aut minus,
sed totæ tres Personæ coæternæ, sibi
sunt & coæquales.

25. Ita ut per omnia, sicut jam su-
pra dictum est, & unitas in Trinitate,
& Trinitas in unitate, veneranda sit.

29. Qui vult ergo salvus esse, ita de
Trinitate sentiat.

30. Sed necessarium est, ad æter-
nam salutem; ut Incarnationem quo-
que Domini nostri **JESU-CHRISTI**,
fideliter credat.

31. Est ergo fides recta, ut creda-
mus, & confiteamur: quia Dominus
noster **JESUS-CHRISTUS** Dei Fi-
lius, Deus & Homo est.

34. Deus est ex substantia Patris,
ante sæcula genitus: & Homo est ex
substantia Matris, in sæculo natus.

35. Perfectus Deus, perfectus Ho-
mo, ex anima rationali, & humana
carne subsistens.

36. Æqualis Patri secundum Divi-
nitatem, minor Patre secundum hu-
manitatem.

37. Qui licet Deus sit & homo, non
duo tamen, sed unus est Christus.

38. Unus autem non conversione

Divinitatis in carnem, sed assumptione humanitatis in Deum.

39. Unus omninò, non confusione substantiæ, sed unitate Personæ.

40. Nam sicut anima rationalis, & Caro unus est Homo, ita Deus & Homo, unus est Christus.

41. Qui passus est pro salute nostra, descendit ad inferos, tertia die Resurrexit à mortuis.

42. Ascendit ad Cœlos, sedet ad dexteram Dei Patris omnipotentis, inde venturus est iudicare vivos & mortuos.

43. Ad cuius adventum, omnes homines resurgere habent cum corporibus suis: & reddaturi sunt, de factis propriis rationem.

44. Et qui bona egerunt, ibunt in vitam æternam: qui verò mala, in ignem æternum.

45. Hæc est fides Catholica: quam nisi quisque fideliter, firmiterque crediderit, salvus esse non poterit.

Gloria Patri, & Filio, & Spiritui Sancto: Sicut erat in principio, & nunc & semper, & in sæcula sæculorum. Amen.

§. II.

Quàm sit necessarium, & salutare omnibus quidem, sed in primis, Regibus, ac Principibus Christianis, tam Ecclesiasticis, quàm secularibus, quotidianum pia, humilis, & perseverantis orationis exercitium: fons inexhaustus, magnorum Dei auxiliorum.



Ummus Imperator noster JESUS-CHRISTUS, transiturus de hoc mundo ad Patrem, post datam suis Eucharistiam; nihil efficacius commendavit illis, quàm vigilantia, & orationis exercitium: Vigilate, inquit, & orate, ut non intretis in tentationem: quod ter ipsis inculcare voluit; & exemplo suo docens, quod verbo prædicabat, ipsemet omnipotens Deus-Homo, qui nullius egebat auxilio, factus in Agoniâ prolixius orabat. Unde patet Christianum, oratione non munitum, esse militem inermem, & spoliatum, hostium telis expositum; quisquis ergo, non vult quotidie orare, non vult quotidie inimicos

animæ suæ superare, semper enim vigilat adversarius noster Diabolus, modò sicut Leo rugiens, modò ut Draco infidiosus circuiens, & quærens quem devoret, cui nisi resistamus perpetuò, per arma fidei, pietatis, & orationis, vincemur, vinciemur, & in barathrum peccati, ac damnationis pertrahemur. Qui vult ergo semper vincere tentatorem, debet semper vigilare, & orare, ne succumbat tentationi; alioquin non perseverabimus in fide, in pietate, in timore, in amore, & in gratia Dei usque in finem: nisi perseveremus cum Christo, in oratione Dei, usque ad mortem.

Memoranda est illa sententia, magni Ecclesiæ Doctoris Sancti Augustini, perpetui oratoris Dei, qui Pelagium gratiæ Dei hostem, hortabatur ad orationem, ut obtineret lumen, & gratiæ auxilium. Sic loquitur, libro de naturâ & gratiâ, *Cap. 43.* Constat, „ inquit, Deum alia non orantibus, „ sicut initium fidei; alia non nisi orantibus præparare, sicut usque in finem perseverantiam. Et illa alia libro de dogmatibus Ecclesiasticis, *Cap. 56.* ex eodem Augustino ex-

„ cerpta. Nullum credimus ad salu-
 „ tem nisi Deo invitante venire, nul-
 „ lum invitatum salutem suam, nisi
 „ Deo auxiliante operari, nullum nisi
 „ orantem auxilium promereri. No-
 „ tandum verò inprimis, quod in hanc
 „ sententiam docet Concilium Tri-
 „ dentinum Sessione VI. *Cap. 11.* id
 „ est, ipsemet Spiritus Sanctus, qui
 „ docet nos, omnem veritatem, per
 „ os Ecclesiæ, & qui omnes fideles
 „ impellit ad orationem. Deus, inquit,
 „ impossibilia non jubet, sed jubendo
 „ monet: & facere quod possis, & pe-
 „ tere quod non possis, & adjuvat ut
 „ possis.

Ex quâ decisione, significatur: pe-
 „ titionem auxilii divini, quo nobis fit
 „ possibilis impletio mandatorum Dei,
 „ tam esse necessariam; quàm necessa-
 „ rium est servare mandata. Quia sine
 „ oratione, hoc nobis esset impossibile:
 „ & nihilominus, nobis imputaretur
 „ transgressio, quia in potestate nostra
 „ est orare, cum divinâ gratiâ, quæ ad
 „ hoc semper est parata: inquit Do-
 „ ctiores Catholici. Ideò Sanctus Leo Pa-
 „ pa, Sermone de jejunio septimi mensis,

Christum ita loquentem; introducit:
 „ Facite quod amo, & amate quod fa-
 „ cio: & si vobis interdum videtur esse
 „ difficile, quod jubeo; ad auctorem re-
 „ currite, ut unde datum est præce-
 „ ptum, præstetur auxilium; non nego
 „ opem, cui tribui voluntatem.

Merito Augustinus vocat oratio-
 nem Christiani, clavem Paradisi: quia
 sicut sine clavi non potest aperiri por-
 ta firmissimè clausa: & clavi quælibet,
 porta etiam ferrea aperitur: sic sine
 oratione, nemo potest aperire sibi ja-
 nuam Coeli, & nulla est porta Coelo-
 rum, quam humilis oratio ac perseve-
 rans, tandem non aperiat: oratio enim
 humiliantis se nubes penetrabit, & do-
 nec propinquet non consolabitur, &
 non discedet donec Altissimus aspiciat,
 dicit Spiritus Sanctus, per Ecclesiasti-
 cum *Cap. 35.* Sed quid pluribus opus
 est testimoniis, post tam claram, &
 iteratam decisionem ipsius Verbi In-
 carnati, quia ipsemet dixit.

„ Petite & accipietis, quærite & in-
 „ venietis; pulsate, & aperietur vobis:
 „ omnis enim qui petit accipit, & qui
 „ quærit invenit, & pulsanti aperietur.

Luca Cap. 11. & iterum efficacius;
Joan. 14. in Sermone suo post cœ-
 nam Eucharisticam. Amen, amen
 „ dico vobis quodcumque
 „ petieritis Patrem in Nomine meo
 „ hoc faciam, ut glorificetur Pater,
 „ in Filio, si quid petieritis me in No-
 „ mine meo hoc faciam. Et iterum,
 „ *Cap. 16.* Amen, amen dico vobis;
 „ si quid petieritis Patrem in Nomine
 „ meo dabit vobis, usque modò non
 „ petistis, quidquam in nomine meo;
 „ petite & accipietis, ut gaudium ve-
 „ strum sit plenum.

Ex quibus omnibus divinis testimo-
 niis de necessitate, utilitate, & effica-
 ciâ orationis, liquet illos Christianos,
 non perseveraturos usque in finem, in
 gratiâ Dei, qui non perseverant in ora-
 tione, idemque esse nolle orare Deum
 humiliter, ac perseverantes, & nolle
 perseverare usque in finem; quia per-
 severantia finalis in gratia Dei, est fru-
 ctus perseverantis orationis. Quod si
 tam necessarium est omnibus Christia-
 nis piæ, humilis, & constantis oratio-
 nis exercitium, quantò magis Regi-
 bus, Principibus potentioribus sæculi,

& Prælati, Episcopis, & iis, qui sunt in quacumque sublimitate spirituali, vel temporali à Deo supra cæteros exaltati; erit necessarium hoc orationis exercitium. Quippè illi magis vacare orationi debent, qui majoribus auxiliis indigent, ut salventur & secum alios salvent; at quinam majoribus Dei auxiliis indigent, ne tentationibus succumbant, & in peccatis moriantur, atque aliis provideant, quàm qui supra cæteros magis exaltantur: nonne illi majoribus undique periculis circumvallantur? majoribus tentationibus à dextris & à sinistris, intus & foris oppugnantur? majoribus illecebris alliciuntur? majoribus obstaculis retardantur? majoribus difficultatibus implicantur? majoribus obligationibus obstringuntur? majoribus infirmitatibus atteruntur? majoribus passionibus inflammantur? nonne in hoc statu constituti sunt, Reges, Principes & Potentiores?

Illi ergo majoribus Dei auxiliis indigentes, magis incumbere tenentur in exercitium orationis, nihilque horribilius est, & perniciosius, quam

quam diem sine oratione transire: & qui Principes ab orationis studio aver-
tunt, semetipsos cum illis perdunt, quos ad vigilandum & orandum tecum excitare debuerant; quare Discipuli omnes relicto Domino suo fugerunt tempore Passionis? nisi quia sicut illos monuerat, cum illo non vigilaverunt tempore orationis.

Atque inter cæteros, Princeps Apostolorum Petrus, ter Dominum suum non negasset; si specialiter, ter iussus orare, non neglexisset. Videant omnes animarum Pastores, in illo terribili humanæ infirmitatis lapsu, quàm sit noxium Ecclesiæ Principibus, & omnibus qui à Deo supra cæteros sunt in potestate constituti, orationis exercitium omittere dormiendo, aut aliud agendo, cum illos oporteret vigilare & orare pro sua & suorum salute. Cæterùm idem Petrus, qui oratione non armatus, ad unius mulierculæ vocem prostratus est; postea Spiritu Sancto, repletus, Spiritu orationis roboratus, tantâ fortitudine donatus est, ut supra firmissimam illam Sedis Apostolicæ Petram, cujus Christus ipse summus

angularis lapis est ; tota Ecclesia Catholica ædificata, immobilis permaneat in hanc usque diem; nec possint unquam superbæ inferorum portæ contra illam prævalere.

Sicut ergo summus omnium Pontifex **J E S U S**, à dextris Dei Patris sedens, semper vivens & vigilans est, ad interpellandum pro nobis ; ita Princeps Apostolorum, semper est de Ecclesiæ sibi à Christo commissæ bono, ac salute sollicitus; ut navis illà fidelium, enavigato tempestuosi hujus sæculi oceano, ad æternæ gloriæ portum securo perveniat; sicut ipse cum adhuc in terris viveret, fidelibus promisit, paulò, ante suum martyrium: Dabo autem operam, inquit ille vigilantissimus gregis dominici Pastor, & frequenter, post obitum meum, habere vos, ut horum memoriam faciatis.

Ex quibus omnibus liquidò constat, quàm sit necessarium Principibus Ecclesiasticis, & sæcularibus orationis quotidianæ exercitium; sine quo non obtinebunt à Deo illa auxilia specialia; cum quibus salvarentur, si ea à Deo benè peterent: Inter omnes Reges

populi Dei, nullus vim, & necessitatem orationis melius intellexit, quam ille qui ignorans litteraturam inflantem, per humilem & continuam orationem, ingressus est in potentias Domini, quem semper providebat in conspectu suo, in cujus lege meditabatur die, ac nocte, & cui septies in die laudem specialiter dicebat, super iudicia justitiæ ejus, sicut ipsemet testatur in Psalmis suis; qui tot orationes ignitas continent, quot versus, quibus tanquam sagittis, amore inflammatis, cor Dei vulnerabat; ejusque magnam misericordiam, sibi in omnibus propitiam reddebat. Enimverò Rex ille pissimus, perpetuâ elevatione mentis suæ in Deum; id est, sine intermissione orando, tria summa bona, à Patre luminum, à quo descendit omne bonum perfectum, obrinuit. Scilicet:

1. Plenam omnium suorum peccatorum remissionem.

2. Maximam intelligentiam mysteriorum Dei, præsertim admirabilis œconomix Incarnationis, Verbi Dei Christi JESU, quem semper ob oculos mentis sibi repræsentabat, in suis

orationibus, & in omnibus actibus vitæ suæ.

3. Denique pretiosam mortem in conspectu Domini, quam secuta est vita æterna. Hi sunt fructus orationis Regalis, viri secundum cor Dei, quem omnes Reges, & Principes Christiani, non modò imitari deberent, sed etiam supergredi in fide, in pietate, & in exercitio piissimæ orationis ad omnia utilis; promissionem habentis vitæ quæ nunc est, & futuræ. Hoc exercitio Christianissimi, & Sanctissimi illi Imperatores, Reges, Principes, quorum meminimus in prima parte Belli Sacri; maxima Dei auxilia pro se, & pro suis, à Deo obtinuerunt: & qui in illud magis incumbunt, Deum sibi, & suis magis habebunt propitium; ut Deus ipse, qui neminem fallere potest, pollicetur in sacris paginis. Tres sunt libri quos perpetuò volvere deberent Reges & Principes Christiani, 1. liber Psalmorum, 2. liber Parabolarum Salomonis, Filii David Regis Israël, cum Ecclesiaste, quem his verbis claudit: finem loquendi pariter omnes audiamus. Deum time

„ & mandata ejus , observa: hoc est
 „ enim omnis homo, & cuncta quæ
 „ fiunt, adducet Deus in iudicium,
 „ pro omni errato, sive bonum, sive ma-
 „ lum illud sit. Tertius liber omnium
 „ præstantissimus, quem Reges, & Prin-
 „ cipes fideles non solum legere, &
 „ intelligere, sed in cordibus suis im-
 „ pressum, & in manibus Regalibus ex-
 „ pressum tenere perpetuò deberent, est
 „ Sacro - Sanctum Evangelium Regis
 „ Regum, Salvatoris omnium homi-
 „ num, Domini nostri JESU-CHRIS-
 „ TI, in quo omnes Thesauri, sapientiæ
 „ & scientiæ Dei sunt absconditi, & om-
 „ nis plenitudo Divinitatis inhabitat
 „ substantialiter.

Si ergo, inquit, Spiritus Sanctus,
 per os Sapientis, delectamini sedibus
 & sceptris ô Reges, diligite Sapientiam,
 increatam & incarnatam; ut in æter-
 num regnetis: neminem enim diligit
 Deus nisi qui cum sapientia inhabitat,
 ipse autem unigenitus Dei Filius factus
 est nobis sapientia à Deo: sapientiam
 autem loquimur inter perfectos, in-
 quit, Doctor gentium, quam nemo
 Principum hujus sæculi, Principum

infidelium cognovit, & in cuius fide, spe, dilectione, invocatione, Religione, Nominis propagatione, gloriantur corda Sanctorum Imperatorum, Regum, Principum Christianorum, atque omnium Electorum Dei in Christo JESU Domino nostro. Quisquis igitur vult cum Davide, & Sanctis Regibus ingredi in potentias Domini, & Deo, uni, trino, atque Verbo Incarnato, Regi Regum, Christo JESU primogenito prædestinatorum, ad vitam æternam adhærere, & illi placere; ac magnis ejus gratiæ donis, abundantius cumulari, perseveret usque ad finem vitæ hujus momentaneæ ac mortalis, quæ nil est nisi mors fluens, in exercitiis pietatis, & orationis ad omnia utilis. Ad hunc finem ordinata sunt Exercitia militaria hujus tertiæ Partis Belli Sacri, in quibus, qui cum Dei gratiâ legitime certando perseveraverit usque in finem, hic salvus erit. Hujus veritatis Evangelicæ & fundamentalis, illustre testimonium, simul & exemplum, omnibus Christianis Regibus, & Principibus præbet: in-

ter cæteros eximiæ pietatis Proceres, Ferdinandus III. Castellæ, & Legionis Rex Catholicus, cui Sancti cognomentum, jam inde à quatuor sæculis, unanimes & constans Ecclesiarum consensus dedere; si quidem Regem illum verè magnum & sanctum, per assiduum orationis, & Christianæ pietatis exercitium, ad sublimioris perfectionis fastigium, gratiâ auxiliatrice evectum esse constat: gloriosus hic Princeps sub Berengariæ Matris, pientissimæ Reginæ, disciplinâ educatus, in eo, adjunctis, regnicuris, Regiæ virtutes, orationis filix illustres emicuere, magnanimitas, clementia, prudentia, justitia; & præ cæteris, Catholicæ fidei zelus, ejusque Religiosi cultus tuendi ac propagandi ardens studium: id præstitit imprimis hæreticos infectando, quos nullibi regnorum suorum consistere passus est. Unde gloriosissimum Regis Catholici nomen, sibi & posteris suis Hispaniarum Regibus, ejusdem fidei Catholicæ & pietatis hæredibus, & propagatoribus, asseruit. Insuper clarruit, Pia & Regia, Sancti Regis mu-

nificentia, in erigendis, dotandis, & consecrandis Christiano ritu nobiliorum per sua regna Urbium Ecclesiis. Numerosis exercitibus collectis, annuas expeditiones contra Saracenos, Christiani Nominis hostes suscepit, semperque victor rediit; quia Rex ille piissimus, nunquam nisi fufis ad Deum, ut omnipotentem sibi propitiaret, Regiis precibus, flagris in seipsum faviens, atque aspero cilicio munitus, ad pugnam procedebat; sicque insignes contra ingentes Maurorum acies, victorias armatis precibus, prælium Domini præliando reportavit. Quas omnes Deiparæ Virginis **MARIE** singulari Patrocinio, ferebat acceptas: cujus Imaginem secum in castris habens, peculiari cultu prosequabatur, Rex Sanctus, & invictus; inter quotidianæ Christianæ pietatis exercitia, majori in dies propagandæ Catholicæ, Religionis zelo accensus, trajicere in Africam parabat, Mahometanum in eâ Imperium eversurus, dum a Rege Regum, ad cujus Nominis majorem gloriam propagandam, toto vitæ suæ cursu militaverat, ad cælestem Re-

giam evocatus est ; in extremo vitæ
 Agone Divinam Eucharistiam, pro
 viatico allatam, fune ad collum alli-
 gato, & humi stratus, cum lacrymis
 ubertim fufis adorans: eâque dignis,
 reverentiâ, humilitate, & Catholicæ
 fidei obtestationibus acceptâ, in splen-
 doribus Sanctorum, in ardoribus Chri-
 stianæ pietatis, in æstu amoris Christi
 JESU, Rex Sanctus, sanctè sicut vi-
 xerat expiravit; cum illo in æternum
 regnaturus, cujus regni, non erit fi-
 nis. In hoc lucidissimo virtutum Re-
 giarum speculo, agnoscant Reges &
 Principes Christiani, nihil esse ad om-
 nia summa perficienda utilius, effica-
 ciusque Regia pietate, illâ unâ Impe-
 ratorem Sanctissimum Henricum Ba-
 varum Germaniæ, Regem Sanctum
 Stepanum Hungariæ, Eduardos Re-
 ges Sanctos Angliæ, Ludovicum San-
 ctum Galliæ, & Ferdinandum San-
 ctum Regem Catholicum Hispaniæ
 peperit. Illa est, quæ omnes, quotquot
 fuerunt militantis Ecclesiæ Hæroes
 formavit, & usque ad thronum Regis
 gloriæ exaltavit. Quisquis ergo vult
 esse verè magnus, coram Deo maxi-

mo, & hominibus, studeat esse Pius. Enimverò pietas Christiana ad omnia utilis, via est Regia ad immortalem Celsitudinem, qui illâ caret, quantumvis cæteris abundet, nil magni possidet.

SECUNDUM EXERCITIUM
MILITARE DIVINÆ
PIETATIS

*Mensis Regalis pientissimi Regum Is-
raël, Viri secundum Cor Dei. Id
est: Sagitta electa, aut Oratio-
nes jaculatoria ex Psalmis Davidi-
cis, in singulos dies mensis distri-
buta.*

Sagitta tua infixæ sunt mihi. Psal. 37.

NARRAT Sanctus Hierony-
mus, suo tempore rusticos
& artifices Christianos, in
totâ ferè Palestinâ, Psalmos
Davidicos decantare solitos, illi du-
cendo aratrum, hi mechanica opera
exercendo. Quàm esset laudabile,

pium, & salutare, omnibus ad Bellum Sacrum, contra inimicos Crucis Christi proficiscentibus: si Duces exemplo suo, gregarios milites hujusmodi orationibus, excitarent, ad implorandum Dei auxilium, sicut faciebant gloriosi Machabæi, præliantes prælium Domini, cum lætitia. Non cedant illis in pietate ad omnia utili, Principes, Duces, & milites Christiani; qui sub Crucis vexillo militant militiam Sacram. Sit ergo hic velut mensis Belli Sacri.

I, D I E S.

*Peccavi Deo meo, peccatum meum
contra me est semper.*

1. **M**iserere mei Deus secundum magnam misericordiam tuam: & secundum multitudinem miserationum tuarum, dele iniquitatem meam.
2. Amplius lava me ab iniquitate mea, & à peccato meo munda me.
3. Averte faciem tuam à peccatis meis; & omnes iniquitates meas dele:

316.
cor contritum & humiliatum Deo
cordis mei, ne despicias, propter faci-
ciem Christiani JESU.

II. DIES.

1. **C**Or mundum crea in me Deus,
& spiritum rectum, innova in
visceribus meis.

2. Ne projicias me à facie tua, & Spi-
ritum Sanctum tuum ne auferas à me.

3. Redde mihi lætitiã salutaris tui,
& spiritu principali confirma me. Illu-
mina oculos meos, ne unquam obdor-
miam in morte: nequando dicat mihi
inimicus meus, prævalui adversus eum.

III. DIES.

1. **D**omine ne in furore tuo arguas
me, neque in ira tua corri-
pias me.

2. Miserere mei Domine quoniam
infirmus sum, sana me Domine, quo-
niam conturbata sunt ossa mea, & ani-
ma mea turbata est valdè, sed tu Do-
mine usquequo?

3. Convertere Domine & eripe ani-
mam meam, salvum me fac, propter
misericordiam tuam; quoniam non est

in morte, qui memor sit tui, in inferno autem, quis confitebitur tibi?

I V. D I E S.

1. **D**Eus cordis mei, delictum meum cognitum tibi feci, & in justitiam meam non abscondi.

2. Dixi confitebor adversum me in justitiam meam Domino; & tu remisisti iniquitatem peccati mei.

3. Tu es refugium meum, à tribulatione quæ circumdedit me; exultatio mea, erue me à circumdantibus me.

In te Domine speravi, non confundar in æternum: in justitia tua, libera me. Esto mihi in Deum protectorem, & in Domum refugii ut salvum me facias.

V. D I E S.

1. **I**niquitates meæ supergressæ sunt caput meum, & sicut onus grave, gravatæ sunt super me.

2. Afflictus sum, & humiliatus sum nimis, rugiebam à gemitu cordis mei.

3. Domine ante te omne desiderium meum, & gemitus meus à te non est absconditus. In te Domine speravi;

tu exaudies me Domine Deus meus;
Educ me de laqueo quem absconde-
runt mihi, quoniam tu es protector
meus.

V I. D I E S.

1. **N**E derelinquas me Domine
Deus meus, ne discesseris à me;
intende in adjutorium meum, Domi-
ne, Deus salutis meæ.

2. Domine exaudi orationem meam,
& clamor meus ad te veniat: Ne aver-
tas faciem tuam à me, in quacumque
die tribulor, inclina ad me aurem tuam.
In quacumque die invocavero te, ve-
lociter exaudi me.

3. Ne revoces me in dimidio die-
rum meorum. De profundis clamavi
ad te Domine, Domine exaudi vocem
meam. Fiant aures tuæ intendentes,
in vocem deprecationis meæ. Si ini-
quitates observaveris Domine, Do-
mine quis sustinebit.

V I I. D I E S.

1. **D**omine exaudi orationem meã,
auribus percipe obsecrationem
meam; in virtute tua exaudi me, in
iustitiã.

2. Non intres in iudicium cum ser-
vo tuo, quia non justificabitur, in
conspetu tuo omnis vivens.

3. Auditam fac mihi manè miseri-
cordiam tuam, quia in te speravi.

VIII. DIES.

1. **N**Otam fac mihi viam in qua am-
bulem, quia ad te levavi ani-
mam meam.

2. Eripe me de inimicis meis Do-
mine, ad te confugi: doce me facere
voluntatem tuam, quia Deus meus
es tu.

3. Ne perdas cum impiis Deus ani-
mam meam, & cum viris sanguinum
vitam meam. In manus tuas commen-
do spiritum meum, redemisti me Do-
mine Deus veritatis.

IX. DIES.

1. **D**Eus, Deus meus respice in
me, quare me dereliquisti;
longè à salute mea verba delictorum
meorum.

2. In te projectus sum ex utero, de
ventre matris meæ, Deus meus es tu,
ne discelleris à me.

3. Tu Domine, ne elongaveris auxilium tuum à me: ad defensionem meam conspice: inclina ad me aurem tuam: accelera ut eruas me.

X. D I E S.

1. **E**Rue à framea Deus animam meam, & de manu canis unicam meam?

2. Salva me ex ore leonis, & à cornibus unicornium humilitatem meam.

3. Custodi animam meam, & erue me, non erubescam, quoniam speravi in te. In manus tuas Domine commendo spiritum meum: miserere mei & salva me.

X I. D I E S.

1. **A**D te Domine levavi animam meam, Deus meus in te confido, non erubescam.

2. Vias tuas Domine demonstra mihi, & semitas tuas edoce me. Deduc me Domine in via tua, & ingrediar in veritate tua: lætetur cor meum, ut timeat nomen tuum.

3. Dirige me in veritate tua & doce me, quia tu es Deus Salvator meus,
& te

& te sustinui tota die: miserere mei, &
exaudi orationem meam.

XII. DIES.

1. **D**elicta juventutis meæ, & igno-
rantias meas ne memineris Do-
mine.

2. Secundum misericordiam tuam,
memento mei tu, propter bonitatem
tuam Domine.

3. Propter nomen tuum Domine,
propitiaberis peccato meo; multum
est enim: misericordia tua super om-
nia opera tua.

XIII. DIES.

1. **R**espice in me, & miserere mei,
quia unicus & pauper sum
ego.

2. Tribulationes cordis mei multi-
plicatæ sunt, de necessitatibus meis
erue me.

3. Vide humilitatem meam, & la-
borem meum: & dimitte universa de-
licta mea, peccavi Deo meo.

XIV. DIES.

1. **R** Espice inimicos meos; quoniam multiplicati sunt, & odio iniquo oderunt me.
2. Averte mala inimicis meis, & in veritate tua disperde illos.
3. Libera Deus Israël: ex omnibus tribulationibus suis.

XV. DIES.

1. **V** Tinam dirigantur viæ meæ, ad custodiendas justificationes tuas?
2. In toto corde meo exquisivi te, ne repellas me à mandatis tuis?
3. In corde meo abscondi eloquia tua, ut non peccem tibi.

XVI. DIES.

1. **R** Etribue servo tuo, vivifica me: & custodiam sermones tuos.
2. Revela oculos meos, & considerabo mirabilia de lege tua.
3. Incola ego sum in terra, non abscondas à me mandata tua: peregrinus sum sicut omnes Patres mei, quando veniam & apparebo ante faciem tuam.

XVII. DIES.

1. **A** Ufer à me opprobrium; & contemptum, quia testimonia tua exquisivi.

2. Adhæsit pavimento anima mea, vivifica me: secundum verbum tuum.

3. Viam justificationum tuarum instrue me, & exercebor in mirabilibus tuis: confirma me in verbis tuis.

XVIII. DIES.

1. **L** Egem pone mihi Domine, viam justificationum tuarum, & exquiram eam semper.

2. Da mihi intellectum, & scrutabor legem tuam; & custodiam illam, in toto corde meo.

3. Inclina cor meum in testimonia tua, & non in avaritiam.

XIX. DIES.

1. **A** Verte oculos meos, ne videant vanitatem: in via tua vivifica me.

2. Statue servo tuo eloquium tuum, in timore tuo.

3. Amputa opprobrium, quod sus-

picatus sum : quia iudicia tua jucunda. Ecce concupivi mandata tua Domine, doce me facere voluntatem tuam.

X X. D I E S.

1. **M**emor esto verbi tui seruo tuo, in quo mihi spem dedisti. Hæc me consolata est in humilitate mea, quia eloquium tuum, vivificavit me.

2. Misericordiâ tuâ Domine plena est terra: justificationes tuas doce me.

3. Bonitatem fecisti cum seruo tuo Domine : secundum verbum tuum, Bonitatem & disciplinam, & scientiam doce me, quia mandatis tuis credidi.

X X I. D I E S.

1. **B**onum mihi quia humiliasti me, ut discam justificationes tuas.

2. Bonum mihi lex oris tui; super millia auri & argenti.

3. Manus tuæ fecerunt me, & plasmaverunt me : da mihi intellectum, & discam mandata tua.

XXII. DIES.

1. **Q**ui timent te, videant me, & lætentur; quia in verba tua superperavi.

2. Fiat misericordia tua, ut consoletur me: secundum eloquium tuum seruo tuo.

3. Veniant mihi miserationes tuæ, & vivam quia lex tua meditatio mea est.

XXIII. DIES.

1. **C**onfundantur superbi, quia injustè iniquitatem fecerunt in me: ego autem exercebor in mandatis tuis.

2. Convertantur mihi, timentes te, & qui noverunt testimonia tua.

3. Fiat cor meum immaculatum in justificationibus tuis, ut non confundar.

XXIV. DIES.

1. **D**efecit in salutare tuum anima mea, & in verbum tuum, superperavi. Inclina Domine aurem tuam & exaudi me: quia inops & pauper sum ego.

2. Defecerunt oculi mei in eloquium tuum, dicentes quando consolaberis me?

3. Tuus sum ego, salvum me fac: quoniam justificationes tuas exquisivi.

X X V. D I E S.

1. **L**ucerna pedibus meis verbum tuum, & lumen semitis meis. Juravi, & statui custodire omnia iudicia, justitiæ tuæ.

2. Humiliatus sum usquequaque Domine: vivifica me secundum verbum tuum.

3. Voluntaria oris mei beneplacita fac Domine: & iudicia tua doce me.

X X V I. D I E S.

1. **A**djutor & susceptor meus es tu, & in verbum tuum speravi.

2. Suscipe me secundum eloquium tuum, & vivam; & non confundas me ab expectatione mea.

3. Adjuva me, & salvus ero: & meditabor in justificationibus tuis semper.

XXVII. DIES.

- i. **C**onfige timore tuo carnes meas:
 à judiciis tuis enim timui.
2. Feci iudicium, & iustitiam; non
 tradas me calumniantibus me.
3. Suscipe servum tuum in bonum:
 non calumnientur me superbi.

XXVIII. DIES.

- F**ac cum servo tuo secundum mi-
 sericordiam tuam: & justificatio-
 nes tuas doce me.
2. Servus tuus sum ego: Domini
 intellectum ut discam mandata tua.
3. Tempus faciendi Domine; dissi-
 paverunt legem tuam.

XXIX. DIES.

- i. **A**spice in me & miserere mei:
 secundum iudicium diligen-
 tium nomen tuum.
2. Faciem tuam illumina super ser-
 vum tuum, & doce me justificationes
 tuas.
3. Clamavi ad te saluum me fac: &
 custodiam mandata tua.

XXX. DIES.

V Ide quoniam mandata tua dilexi
Domine: in misericordia tua vi-
vifica me.

2. Septies in die laudem dixi tibi:
super iudicia iustitiæ tuæ.

3. Appropinquet deprecatio mea,
in conspectu tuo Domine: juxta elo-
quium tuum, da mihi intellectum,
intret postulatio mea in conspectu tuo;
secundum eloquium tuum eripe me.

XXXI. DIES.

1. **P**rotector noster aspice Deus:
& respice in faciem Christi tui;
propter David servum tuum: non aver-
tas faciem Christi tui.

2. Unam petii à Domino, hanc re-
quiram; ut inhabitem in domo Do-
mini omnibus diebus vitæ meæ, ut
videam voluptatem ejus.

3. Quemadmodum desiderat cer-
vus ad fontes aquarum, ita desiderat
anima mea ad te Deus: Deus cordis
mei, & pars mea Deus, in Æternum:
adimplebis me lætitiâ cum vultu tuo.
Satiabor cum apparuerit gloria tua. In

manus tuas Domine commendo spiritum meum.

TERTIUM EXERCITIUM
CHRISTIANÆ PIETATIS.

*Oratio Divini Oratoris Domini nostri
JESU CHRISTI:*

Præceptis salutaribus, & Divina institutione formati, audemus dicere

PATER NOSTER.

DEUS, unus, trinus, omnipotens? tu es Pater omnium hominum, per creationem, quâ nos omnes ad imaginem tuam mirabiliter formasti. Tu es Pater omnium Christianorum per regenerationem, quâ omnes Sacro Baptismate in Christo renatos mirabilius reformasti, & ejus membra mystica Sancto Spiritu vivificata Divinitus effecisti. Tu es Pater electorum in dilecto, dilecto Deo. Homine illustrissimo Exemplari prædestinatorum, ad vitam æternam; qui tibi similes erunt

in gloriâ tuâ, quando adimplebis eos gaudio tuo, & omni bono; ostendens illis vultum tuum, essentiam tuam, quam revelata facie in æternum contemplabuntur, sibi in illa complacentes, sicut tu in illis; ô Beata Trinitas Deus, unus, trinus, omnium principium & finis, omnes electos tuos Beatos in te solo reddens, ô Pater noster.

Qui es in Cælis.

QUAMVIS ubique sis præsens per essentiam, potentiam, & immensitatem, in Cælis tamen Beatorum; ut in Throno Majestatis tuæ resides: ubi omnes qui ibi sunt & erunt, Divinitatem tuam in Trinitate, sicut est in se intuitivè videbunt & contemplabuntur in perpetuas Æternitates: quâ visione, dilectioni, & fruitioni tuæ indivisim conjunctâ; omnes contemplatores, amatores, & possessores tuos beabis; & omni bono ac gaudio cumulabis, in sæculum sæculi.

Tu es in Cælis Ecclesiæ tuæ militantis, in Templis tibi Soli Deo, uni, trino, dicatis, ubi substantialiter abs-

conditus continetur in Eucharistico Sacramento, totus Christus Rex Glorix, Cœlum cœli, Dominus Cœlorum omnium. Tu es speciali quodam ineffabili & verissimo modo in omnibus justis, qui sunt in Cœlis, & super terram; qui Sancto Spiritu tuo vivificati, sunt Cœli tui mystici, in quibus jucundissimè habitas, & te illis communicas, & es omnia in omnibus.

I. *Sanctificetur nomen tuum.*

IN gentibus, quæ te ignorantes, sanctum tuum Nomen non invocant. Sanctificetur in mundi amatoribus, & in omnibus, qui se Christianos verbis profitentes, vel non credunt in corde, vel fidei veræ, corruptis moribus, & factis impiis contradicunt; per quos Nomen tuum blasphematur in gentibus. Sanctificetur in dies magis in spiritualibus adoratoribus tuis, ut de virtute in virtutem, in sanctitate & justitia coram te semper procedant, crescant & proficiant, usque ad perfectum diem gloriæ suæ in sinu divinitatis tuæ.

II. *Adveniat regnum tuum.*

Per abbreviationem dierum malorum regni iniquissimi Principis hujus mundi, in maligno positi.

Per propagationem regni Christi **JESU**, Ecclesiæ suæ militantis, ut prædicetur Evangelium ejus in universo mundo.

Per gloriosum adventum Regis Regum omnium Judicis, qui reddet unicuique secundum opera ejus: accende in cordibus tuorum, ardentissimum desiderium, videndi Regem Gloriæ, in Throno Majestatis suæ, super omnia ad Patris dexteram exaltatum.

III. *Fiat voluntas tua: sicut in Cælo, & in terra.*

Fiat in hominibus de terra terrenis peregrinantibus à te voluntas tua, bona, beneplacens, & perfecta; sicut fit in cælestibus intelligentiis, & in animabus beatis: quæ nil volunt nisi quod vis; sicut vis, & quia vis, nihil ultra desiderantes.

IV. *Panem nostrum quotidianum
da nobis hodie.*

PANEM rerum necessariarum, ad hanc vitam mortalem, quantum expedit ad gloriam tuam conservandam tibi. Panem verbi tui, quo mentes nostræ æternis veritatibus absconditis à sapientibus & prudentibus, illuminentur de die in diem, & corda piis affectibus, & ardentibus desideriis divinæ tuæ dilectionis accendantur; maximè verò da panem illum cælestem supersubstantialem, ipsum omnium bonorum, omnis gratiæ & gloriæ auctorem continentem, in se substantialiter: quo vescentes quotidie post congruam nostri probationem; in ipsum, qui est vita nostra, per Eucharisticam communionem, transformati, ac divinitate & humanitate ejus saginati: non vivamus nisi per ipsum, sicut ipse, & propter ipsum, in te Deo vitæ nostræ.

V. *Et dimitte nobis debita nostra;
sicut & nos dimittimus debi-
toribus nostris.*

DE cordibus nostris, nulli red-
dentes malum pro malo, orantes
pro persequentibus nos; benefacien-
tes propter Nomen tuum: iis qui ode-
runt nos gratis. Dimitte igitur debita
nostra, quæ contraximus tripliciter,
cogitatione, verbo, & opere, sive
omissione bonorum quæ præcipiebas,
sive commissione malorum quæ veta-
bas, sive ex ignorantia, sive ex mali-
tia, sive ex fragilitate; sicut & nos
omnia omninò dimittimus debitoribus
nostris, ut misericordiam tuam con-
sequamur.

VI. *Et ne nos inducas in tentationem.*

Concupiscentiæ carnis, concupif-
centiæ oculorum, & superbiæ
vitæ, quæ semper nos ad peccatum al-
liciunt, & ab ipso maligno spiritu ac-
cenduntur. Ne ergo finas nos succum-
here tentationi, quâ inimici nostri

visibiles & invisibiles, extra & intra nos conantur separare tuos à te: da nobis, gratiam illam magnam, cum quâ legitimè certantes vincemus omnia, quæ militant adversus animam.

VII. *Sed libera nos à malo.*

PRæterito, cujus plagæ tantò sunt periculosiores, quantò minus sentiuntur à nobis; præsentis, quo gravamur: & futuro quo involvemur; nisi singulari tuo auxilio arceantur à nobis.

Amen.

ITa fit, ita fiat, sic à te exaudiamur, bonis tuis cumulemur, ab omnibus malis eripiamur & liberemur, ut tibi soli Deo, uni, trino, vivamus, & sis solus omnia in tuis omnibus.

Ex intelligentiâ hujus Orationis Dominicæ, patet omnes ejus petitiones sic esse à Christo, Divino Oratore nostro ordinatas: ut à Dei Patris nostri cælestis infinitâ bonitate obtineamus donum perseverantiæ finalis in gratia

& charitate ejus, quâ introducatur
in vitam æternam: de hac perseve-
rantia dixit Christus, qui persevera-
verit, usque in finem: hic salvus erit.

SALUTATIO
ANGELICA.

HÆc Salutatio à Spiritu Sancto
dictata: composita est, ex ver-
bis Sancti Archangeli Gabrië-
lis, Sanctæ Elizabeth, Matris præ-
cursoris Verbi Incarnati, & ex
Verbis Sanctæ Ecclesiæ: quæ il-
lam ita ordinavit, ut per interces-
sionem potentissimam Dei Genitri-
cis Virginis MARIÆ, Advocata
nostræ apud Sanctissimam Triad-
dem, obtineamus facilius, & abun-
dantiis, quæ à Patre nostro cælesti,
Deo, uno, trino, petimus, per Ora-
tionem Dominicam: cui proindè im-
mediatè subnectitur hæc Salutatio An-
geli, Elizabethæ, Ecclesiæ Sanctæ:
ut autem sapienter, piè, & reveren-
ter; spiritu, & mente, ex abundan-
tiâ cordis, Matrem illam admirabilem,
Reginam Angelorum & Sanctorum
omnium

omnium Dei Genitricem salutemus,
omnes animæ illuminatæ potentias, di-
latemus in congregatione Sanctorum.

Ave Maria.

Domina exaltata super omne quod
Deus non est, illuminata à princi-
pio creationis tuæ, in initio viarum
tuarum, primogenita inter omnes
creaturas puras: tu una supergressa
es universas, ideo omnium nomine te
saluto: *Ave Maria.*

Gratia plena.

Triplici plenitudine, in quam se
infundit, tota plenitudo gratia-
rum: auctoris gratiæ, solis justitiæ, Re-
gis Gloriæ, Sancti Sanctorum Gratia
plena ab initio Immaculatæ Concep-
tionis tuæ, primo illo momento luci-
dissimo, quo gratiosa, & Sancta, ac
charitate tota ignita anima tua, creata
est à Deo: & unita Corpori tuo Virgi-
nali, Cœlis & Spiritibus Beatis purio-
ri, gratiæ plenioris abundantia super-
impleta, in Conceptione Verbi Incar-
nati in te, & ex te solâ de Spiritu San-
cto concepti.

Gratiã pleniffimẽ cumulata, in ultimo sanctiffimæ tuæ vitæ mortalis momento, & transitu ad immortalem.

Dominus tecum.

Qui te ab æterno, inter omnes Personas creatas & creandas singulariter dilectam, elegit, electam prædestinavit, prædestinatam vocavit ad consummandum in te, per te, & tecum opus novum omnium suorum operum Diviniffimum, Verbi Incarnati ex te mysterium: maximum sapientiæ, omnipotentia & pietatis Divinæ Triadis Sacramentum. Quod enim natum est ex te Sanctum, vocatum est Filius Dei, unigenitus Patris Virginis: idemque unigenitus tui sinus virginalis, qui sic fuit tecum ab initio, Dominus tuus & Deus tuus, semper est & erit tecum: & tu cum illo, dilectus tuus tibi, & tu illi; in te in æternum commorabitur, qui est in te omnia.

Benedicta tu in mulieribus.

TU omnium omninò, in te unã: quæ in universas sunt dispersæ

Benedictiones, gratiæ, perfectiones,
 perfectissimè colligis & supereminen-
 ter possides, & quod unicum tuum
 est privilegium, gaudia Matris habes.
 Cum Virginitatis honore, semper Vir-
 go in æternum manens, Dei Genitrix
 verè Dei-para, Mater admirabilis, quia
 non est impossibile apud Deum omne
 Verbum: Beata quæ credidisti, &
 quem genuisti ex te, in spiritu & veri-
 tate adorasti, atque ex toto dilexisti.

Benedictus fructus Ventris tui JESUS.

OMnis tuæ Benedictionis, origo,
 fons, principium, medium, finis,
 gaudium & corona tua Deus-Homo,
 totus tuus, Emmanuel tuus.

*Sancta Maria Mater Dei: ora pro
 nobis peccatoribus nunc, & in hora
 mortis nostris. Amen.*

IMpetra mihi & omnibus, qui te
 mecum invocant tres magnas gra-
 tias, 1. Remissionem peccatorum om-
 nium, 2. Magnum gratiæ in dies in-
 crementum, 3. Et finalem in consum-
 mata charitate perseverantiam. Amen.

TRES-ORATIONES

*Sancta Mechtildis ad B. Virginem Dei
Gentricem pro obtinenda felici morte.*

I.

O Domina mea Sancta MARIA:
Dei Genitrix Virgo sicut Deus
Pater, per Omnipotentiam
suam, te potentissimam effecit: ita
mihi quæso adsis in hora mortis meæ,
expellendo à me omnem contrariam
potestatem. *Ave Maria.*

II.

O Domina mea Sancta MARIA:
Dei Genitrix Virgo, sicut te Fi-
lius Dei, unigenitus tuus, tanta sui
cognitione donavit: ita in hora mortis
meæ animam meam, fidei luce sic il-
lustrari, & corroborari intercede, ut
nullo errore aut ignorantia pervertatur. *Ave Maria.*

III.

O Domina mea Sancta MARIA:
Dei Genitrix Virgo, sicut Spiri-
tus Sanctus, suum amorem tibi plenè
infudit, ita in hora mortis meæ dul-

cedinem amoris Divini, mihi infundi
præcare, ut omnis amaritudo mihi red-
datur suavissima, & Divinâ gratiâ robo-
ratus omnia vincam. *Ave Maria.*

Audi Verbum Verbi Dei Incarnati
JESUS-CHRISTI Crucifixi, tibi
dicentis:

Ecce Mater tua.

MARIAM Virginem Dei Geni-
tricem, accipe in tuam: illam
honora, dilige; cole, invoca, glori-
fica, usque in finem vitæ tuæ, obti-
nebit tibi felicem mortem optima Ma-
ter.

SELECTÆ ORATIONES
ECCLESIAE MILITANTIS.

*Hymnus & Oratio ad obtinendum Prin-
cipibus Christianis, & omnibus fide-
libus Spiritum Sanctum, Patris &
Filii Æternum Vinculum, & omnis
Sancti fœderis firmamentum.*

Veni Creator Spiritus,
Mentes tuorum visita,
Imple supernâ gratiâ,
Quæ tu creasti pectora.
Qui Paraclitus diceris,

Donum Dei Altissimi,
Fons vivus, ignis, charitas,
Et spiritalis unctio.

Tu septiformis munere,
Dextræ Dei, tu digitus,
Tu ritè promissum Patris,
Sermone ditans guttura.

Accende lumen sensibus,
Infunde amorem cordibus,
Infirma nostri Corporis,
Virtute firmans perpeti.

Hostem repellas longius,
Pacemque dones protinus,
Ductore sic te prævio,
Vitemus omne noxium.

Per te sciamus da Patrem,
Noscamus atque Filium,
Te utriusque Spiritum,
Credamus omni tempore.

Gloria Patri Domino,
Natoque, qui à mortuis,
Surrexit, ac Paraclito,
In sæcula sæculorum. Amen.

ÿ. Emitte spiritum tuum, & crea-
buntur,

℞. Et renovabis faciem terræ.

I. O R A T I O.

DEUS qui corda fidelium Sancti Spiritus illustratione docuisti, da nobis in eodem spiritu recta sapere; & de ejusdem semper consolatione gaudere: Per Dominum nostrum **JESUM-CHRISTUM**, qui tecum vivit & regnat, in unitate ejusdem Spiritus Sancti Deus, per omnia sæcula sæculorum. Amen.

II. O R A T I O.

*Ad obtinendum firmitatem, in fide
Sanctissimæ Trinitatis.*

OMnipotens sempiterne Deus, qui dedisti famulis tuis, in confessione veræ fidei, **Æternæ Trinitatis** Gloriam agnoscere; & in Potentiâ Majestatis adorare Unitatem, quæsumus ut ejusdem fidei firmitate, ab omnibus muniamur adversis: Per Dominum nostrum **JESUM-CHRISTUM**, filium tuum qui tecum vivit & regnat, in unitate Spiritus Sancti Deus, per omnia sæcula sæculorum. Amen.

III. ORATIO.

*Ad obtinendum libertatem Filiorum
Dei, per novam Nativitatem
unigeniti Patris.*

Concede quæsumus omnipotens
Deus, ut nos unigeniti tui, no-
va per Carnem Nativitas, liberet, quos
sub peccati jugo, vetusta servitus te-
net: qui tecum vivit & regnat, in
unitate Spiritus Sancti Deus. Amen.

IV. ORATIO.

*Ad obtinendum visionem Beatificam
Divinae Trinitatis.*

Deus qui Unigenitum tuum, gen-
tibus, stellâ duce revelasti: con-
cede propitius, ut qui jam te ex fide
cognoscimus, usque ad contemplan-
dam speciem tuæ Celsitudinis perdu-
camur: Per eundem Dominum no-
strum JESUM-CHRISTUM, filium
tuum, qui tecum vivit, & regnat in
unitate Spiritus Sancti Deus. Amen.

V. ORATIO.

*Ad obtinendum per Eucharistiam, per-
petuum fructum nostræ Redemptionis.*

Deus qui nobis sub Sacramento
mirabili passionis tuæ memoriam

reliquisti; tribue quæsumus, ita nos Corporis, & Sanguinis tui sacra mysteria venerari, ut Redemptionis tuæ fructum in nobis jugiter sentiamus: qui vivis & regnas cum Deo Patre, in unitate Spiritus Sancti Deus.

V I. O R A T I O.

Ad obtinendum perpetuum timorem, & amorem Dei super omnia.

Sancti Nominis tui Domine, timorem pariter & amorem, fac nos habere perpetuum; quia nunquam tuâ gubernatione destituis, quos in soliditate tuæ dilectionis instituis: Per Dominum nostrum **JESUM-CHRISTUM**, filium tuum, qui tecum vivit & regnat, in unitate Spiritus Sancti Deus. Amen.

V I I. O R A T I O.

Ad obtinendum sessionem ad dexteram Christi in die ultimi Judicii.

Domine **JESU-CHRISTE**, qui de Coelis ad terram de sinu Patris descendisti, & Sanguinem tuum pre-

tiosum, in remissionem peccatorum,
nostrorum fudisti, te humiliter depre-
camur, ut in die iudicii, ad dexteram
tuam, audire mereamur, venite Be-
nedicti: qui vivis & regnas, cum Deo
Patre, in unitate Spiritus Sancti Deus,
per omnia sæcula sæculorum. Amen.

Sanctissima Trinitas unus Deus, ad
majorem gloriam Nominis tui: per ma-
gnam infinitæ pietatis tuæ Sacramen-
tum, in Deo-Homine JESU-CHRIS-
TO, omnium hominum, maximè fide-
lium Salvatore, consummatum: mi-
ferere nobis, dele omnia peccata no-
stra: ne permittas nos separari à te, sed
invocantes te, confirmas in gratiâ tuâ; &
jube nos, in electorum tuorum grege
numerari: ut in Æternum fruamur te,
Deo, uno, trino, qui solus es qui est
Deus noster & omnia. Amen.

Gloria Patri & Filio, & Spiritui
Sancto: Sicut erat in Principio, &
nunc & semper, & in sæcula sæculo-
rum. Amen.

✠
Mlites Christiani, qui pro gloriâ
Crucis Christi Deo exercituum,
impellente ad Bellum Sacrum, contra

Ecclesiæ militantis inimicos. procedunt: æmulari debent Sanctos Martyres, omni desiderio exoptando totum Sanguinem effundere pro Imperatore suo optimo, Rege Regum JESU-CHRISTO, qui in Cruce semetipsum obtulit pro omnibus: proponant igitur sibi quotidie Exemplum Regis Martyrum, & omnium qui pro ejus Nomine sanguinem suum effuderunt: illorum Heroum magnanimis actibus semetipsos compellant, ad præliandum prælium Domini cum lætitia, ut faciebant generosi Machabæi: quos non solum imitatus est, sed etiam superavit Sanctus Mauritius, Mars Christianus, cum suis: nunquam enim tam fortiter, pro sua urbe Hebræus aut Romanus miles, quam pro fide Catholicâ Romanâ, Tebææ Legionis Dux decertavit. Enimvero stetit immobilis, inermis & nudus, in acie cum suis commilitonibus Mauritius, palo alligatus, melle illitus, innumeris vesparum aculeis confusus, & tamen vel sic, triumphator vicit; in parvis bestiolis maximum tyrannum; mortemque demum

obiit melle quo manabat dulciorem.
 Triumphos Martyrum fidelibus
 suis, ponit ob oculos, Ecclesia mili-
 tans in terris, sub Christi vexillo, ut
 illos imitari non pigeat quod celebra-
 re delectat.

Audiant ergo generosi Milites ad
 Sacrum Bellum vocati; verba exhor-
 tatoria Sponsæ Regis Martyrum Chri-
 sti J E S U, omnium Christianorum
 Imperatoris.

Sanctorum meritis inclita gaudia,
 Pangamus focii, gestaque fortia,
 Gliscens fert animus promere cantibus
 Victorum genus optimum.

Hi sunt, quos fatuè, mundus abhorruit,
 Hunc fructu vacuum, floribus aridum,
 Contempsere, tui nominis affeclæ,
 J E S U Rex bone Cœlitum.

Hi pro te furias, atque minas truces,
 Calcarunt hominum, sævaque verbera,
 His cessit lacerans, fortiter ungula,
 Nec carpfit penetralia.

Cædantur gladiis more bidentium,
 Non murmur resonat, non querimonia,
 Sed corde impavido, mens bene conscia
 Conservat patientiam.

Quæ vox, quæ poterit lingua retexere?
 Quæ tu Martyribus munera præparas?
 Rubri nam fluido Sanguine fulgidis
 Cingunt tempora Laureis?

Te summa ô Deitas, unaque poscimus,
 Ut culpas abigas, noxia subtrahas,
 Des pacem famulis, ut tibi gloriam,
 Annorum in seriem canant. Amen.

Trinitas Divina, Deus, unus, tri-
 nus, qui nos Sanctorum Martyrum,
 tuorum Triumphis lætificas, concede
 propitius, ut quorum gaudemus me-
 ritis, accendamus exemplis: Per JE-
 SUM-CHRISTUM Dominum nostrum.

H Y M N U S

Sancti Ambrosii & Augustini.

TE Deum laudamus, te Domi-
 num confitemur,
 Te Æternum Patrem, omnis terra
 veneratur,
 Tibi omnes Angeli, tibi Coeli & Uni-
 versæ potestates,
 Tibi Cherubim & Seraphim, inces-
 sibili voce proclamant,
 Sanctus, Sanctus, Sanctus, Dominus
 Deus Sabaoth,
 Pleni sunt Coeli, & terra Majestatis
 gloriæ tuæ,

Te gloriosus Apostolorum chorus,
 Te Prophetarum laudabilis numerus,
 Te Martyrum candidatus, laudat
 exercitus,
 Te per orbem terrarum, Sancta con-
 fitetur Ecclesia,
 Patrem immensæ Majestatis,
 Venerandum tuum, verum & uni-
 cum Filium,
 Sanctum quoque Paraclitum Spiritum,
 Tu Rex Gloriæ Christe JESU,
 Tu Patris, sempiternus es Filius,
 Tu ad liberandum suscepturus homi-
 nem,
 Non horruisti Virginis uterum,
 Tu devicto mortis aculeo, aperuisti
 credentibus regna Cœlorum,
 Tu ad dexteram Dei sedes, in gloria
 Patris,
Judex crederis esse venturus,
Te ergo quaesumus tuis famulis subveni,
quos pretioso sanguine redemisti,
 Æterna fac cum Sanctis tuis in gloria
 numerari:
 Salvum fac populum tuum Domine,
 & benedic hereditati tuæ,
 Et Rege eos, & extolle illos usque in
 æternum,

Per singulos dies benedicimus te, &
 laudamus nomen tuum in sæculum,
 & in sæculum sæculi,

*Dignare Domine die isto sine peccato nos
 custodire,*

Miserere nostri Domine, miserere no-
 stri,

Fiat misericordia tua Domine super
 nos, quemadmodum speravimus
 in te,

*In te Domine speravi, non confundar
 in Aeternum.*

Pater, Verbum & Spiritus Sanctus,
 hi tres unum sunt.

Omnes omnino creaturæ, qua si non
 sint: sic sunt coram Deo, uno, trino,
 & quasi nihilum & inane, reputatæ
 sunt ei, qui solus est, qui est. Soli ergo
 Deo, uni, trino, omnis honor, amor
 & gloria. Amen.



QUARTUM EXERCITIUM
MILITARE CHRISTIANÆ
PIETATIS.

*Brevis instructio militibus Christianis,
ad Bellum Sacrum euntibus
commendanda.*

MILES Christianus singulis diebus ter, mane, sub meridiem, & vesperi signo Crucis se muniat, & præsertim cum accingit se ad prælium; sicut faciebant Sanctus Martinus, Sanctus Georgius, & Sanctus Mauritius, qui signo hoc salutari, armati intrepidi; sicut leones ignem spirantes in hostes irruebant. Dicant ergo signantes se reverenter, attentè, & piè hoc signo salutis. *In nomine Patris, & Filii, & Spiritus Sancti. Amen.* Deinde.

1. Eliciant actus fidei in Sanctissimam Triadem, & in JESUM-CHRISTUM: profitendo se velle pugnare, & mori: ut decet veros, & generosos milites Sanctæ Ecclesiæ, Catholicæ, & Romanæ: Exempli gratia: Credo in unum Deum trinum, Patrem Filium, & Spiri-

& Spiritum Sanctum Creatorem omnium: & in unum JESUM-CHRISTUM, Deum-Hominem, omnium hominum Salvatorem, pro omnibus in cruce mortuum; pro cujus gloria vellem cum ejus gratia in hoc Bello Sacro Sanguinem meum effundere.

2. Deus in adjutorium meum intende, Domine ad adjuvandum me festina: Gloria Patri, & Filio, & Spiritui Sancto. Dignare Sanctissima Trinitas unus Deus, per nomen JESU-CHRISTI, die isto me, & omnes meos commilitones, sine peccato custodire: Miserere nostri Domine, miserere nostri: fiat misericordia tua super nos; nunc, & in hora mortis nostræ. Amen.

3. Sancta MARIA Dei Genitrix, Mater admirabilis, Sanctus Michael, Princeps militiæ cælestis, Sancti nostri Angeli custodes, Sanctus Joseph, & omnes Sancti Dei, intercedant pro nobis ad Dominum: ut nos mereamur ab eo adjuvari & salvari, nunc & in horâ mortis nostræ: Per Dominum nostrum JESUM-CHRISTUM. Et fidelium animæ, per misericordiam

Z

Dei requiescant in pace. Amen. Quibus dictis recitent reverenter Orationem Dominicam, & Salutationem Angelicam, ad obtinendum finem optatum Belli Sacri.

Sic Milites Christiani, ter in die exercent se ad pietatem, declinentque à peccato mortali, maximè à latrocinis, impudiciis, ebrietatibus, & blasphemis.

4. Ut obtineant à Dei bonitate gratiam, moriendi in statu gratiæ; cum pauci possint Sacramentis Ecclesiæ muniri, ob defectum Sacerdotum: quotidie ad hos actus præcipuos Christianæ pietatis, assuescant, non solum milites, sed etiam Duces, ac Præfecti castrenses.

1. Credo in te Deum, unum, trinum, Patrem, Filium, & Spiritum Sanctum: utinam hanc fidem in te Deum meum Sanguine meo confirmare merear.

2. Superspero cum omni fiduciâ in te Deum optimum & omnipotentem, cujus misericordiæ non est numerus.

3. Doleo ex toto corde, quia peccavi tibi Deo meo: propitius esto mihi.

peccatori propter merita J E S U
CHRISTI, Crucifixi pro me. Malo
mori pro te in hoc Bello tuo, quam
peccare in te.

4. Diligo te super omnia propter te,
ô infinita bonitas, Deus meus chari-
tas mea!

5. O Divina Trinitas, in manus
tuas commendo animam meam, cum
Spiritu J E S U mei Crucifixi & mortui
pro me. Mi J E S U esto mihi J E S U S,
suscipe spiritum meum, Sanguine tuo
Redemptum.

6. Trinitas Divina, Deus meus &
omnia, miserere mei.

7. J E S U S J E S U S esto mihi J E S U S.

8. M A R I A monstra te meam apud
Deum J E S U M. Amen.



Milites Christiani singulari cum
fiduciâ invocent quotidie Reginam
Cœli, & terræ Dominam, terribilem,
inimicis Christi, sicut castrorum acies
ordinata.

ANTIPHONA ECCLESIAE

Ad Reginam Matrem Regis Regum.

Salve Regina, Mater misericordiae; vita, dulcedo, & spes nostra salve, ad te clamamus, exules filii Evæ; ad te suspiramus gementes & flentes in hac lacrymarum valle, *Ergo Advocata nostra*, illos tuos misericordes oculos ad nos converte, & **JESUM** Benedictum fructum Ventris tui nobis post hoc exilium ostende; ô Clemens, ô pia, ô dulcis Virgo **MARIA**.

ψ. Ora pro nobis Sancta Dei Genitrix,

℞. Ut digni efficiamur promissionibus Christi.

Omnipotens sempiterne Deus, qui gloriosæ Virginis Matris **MARIÆ**, corpus & animam ut dignum filii tui habitaculum effici mereretur, Spiritu Sancto cooperante, præparasti: da ut cujus commemoratione lætamur, ejus piâ intercessione ab instantibus malis, & à morte perpetuâ liberemur: Per eundem Christum Dominum nostrum. Amen.

Divinum auxilium maneat semper
nobiscum: & fidelium animæ per mi-
sericordiam Dei requiescant in pace.
Amen.

QUINQUE INCITAMENTA

*Ad accendendum in cordibus militum,
Ducum, & Principum Christiano-
rum, ignem divina pietatis,
ad omnia utilis.*

I.

ANte omnia semper in mente
habe Deum, unum, trinum,
omnipotentem, omnia viden-
tem, omnibus præsentem, optimum,
& justissimum, ditissimum in omnes
qui invocant illum; remuneratorem
bonorum, ultorem iniquorum: nil ita
time quam Deum habere inimicum;
nil ita desidera, quam Deum tuum ha-
bere amicum: quia felix est amicus
Dei, inimicus miser.

II.

Semper aspice in auctorem, & con-
summatorum fidei tuæ, Deum-
Hominem **JESUM-CHRISTUM,**

exinanitum, Crucifixum, glorificatum, ad dexteram altissimi: ut omnium corda, trahat ad seipsum.

I I I.

Semper Immaculatam, Virginem Dei Genitricem, Matrem admirabilem **MARIAM**, Matrem pulchræ dilectionis, & timoris, & agnitionis, & sanctæ Spei; Matrem Divinæ gratiæ, & misericordiæ, ac Reginam Sanctorum omnium: quam Unigenitus ejus Filius, in Cruce moriens dedit omnibus fidelibus in Matrem: accipe in tuam, ne dimittas eam; invoca, dilige, honora ut Dei Matrem.

I V.

Semper unam, Sanctam, Catholicam, Apostolicam, ac Romanam, Ecclesiam columnam & firmamentum veritatis, & Christianæ pietatis, omnium Filiorum lucis Matrem, & magistram: ejusque in primis unicum visibile caput, universalem gregis Dominici Pastorem, Christi in terris summum Vicarium, Pontificem maximum agnosce, audi, sequere, tuere usque ad mortem;

nulla potentia, te avellat à sinu Sanctæ Romanæ Ecclesiæ, extra quam nulla est salus.

V.

Semper memorare novissima tua, respiciens finem tuum, & sic cum Dei gratiâ labora, pugna, legitimè certa, ut merearis coronam Justitiæ recipere, de manu remuneratoris optimi, & æquissimi: firmissimè credens, quia qui creavit, & redemit te sine te, non salvabit te sine te. Etenim non erit, in te omnipotens operator salutis tuæ, nisi cum ejus auxilio, sis cooperatur Salvatoris tui. Gratia Dei tecum, vide ne in vacuum, gratiam Dei accipias, si enim non est Dei gratia, quomodo Deus salvat mundum, & si non est liberum arbitrium, in vacuum gratiam Dei recipiens, quomodo justus Judex damnat mundum? hoc brevissimum tene: nec te gratia necessitat ad bonum, nec tentatio necessitat ad malum, nec Deus impossibilia jubet, sed jubendo monet, & facere quod possis, & petere, quod non possis, & adjuvat ut possis: ergo perditio, tua Israël, in Deo tantummodo auxilium tuum.

DECEM VERBA

*Salutaria perpetuò recolenda ab
omnibus fidelibus.*

1. **T**Rinitas Divina, Deus meus & omnia.
2. Deus-Homo Christus **J E S U S**, vita mea.
3. **M A R I A** Virgo Dei-para, Mater mea.
4. Ecclesia Dei vivi, sola Catholica Romana, extra quam salus nulla.
5. Spiritualis anima, ad imaginem Dei creata in Christo **J E S U** renata: hæc una salvanda.
6. Dei gratia, cum libertate humanâ, nec ad bonum, nec ad malum necessitata.
7. Judicia Dei æquissima, inscrutabilia, abyssus multa; & novissima semper memoranda.
8. Charitas, vera dilectio Dei, & proximi: pietate Eucharisticâ inflammata, vincit omnia.
9. Finalis perseverantia in sanctitate consummata.
10. Vita **Æ**terna, justitiæ corona: in

Divinae Trinitatis possessione perfecta: Ecce omnia.

ACTUS DIVINI

Heroum Christianorum Victorum mundi, filiorum Altissimi, Coharedum, Regis Regum Hominis Dei
JESU-CHRISTI.

I. A C T U S.

DEo, uni, trino, omnium Principio & fini, ex toto corde adherere.

II.

IN Auctorem & consummatorem fidei Deum-Hominem **JESUM-CHRISTUM**, Crucifixum, Salvatorem omnium hominum, maximè fidelium, semper aspicere: & ejus nomen, cum omni fiducia invocare.

III.

IN diebus hujus mortalitatis, & Belli perpetui, contra inimicos Dei, Carne & Sanguine Agni Immaculati **JESU-CHRISTI**, Corpus & animum sæpissimè, spiritualiter & sacramentaliter, cibare, confortare, saginare,

CUm magno Dei auxilio, prospera mundi despiceret, nulla ejus adversa formidare: semetipsum abnegare, & vincere quotidie.

V.

CUpere dissolvi, & totum Sanguinem effundere pro Christo Deo **JESU** nostro, qui tradidit semetipsum pro nobis: & **Æternam Beatissimæ Triadis** visionem omni desiderio desiderare.

Hi sunt quinque **Actus Divini Heroorum Christianorum**, qui ad majorem gloriam **Divinæ Trinitatis**, & **Christi JESU**, atque **Ecclesiæ Dei vivi**: sua omnia, & seipsum in perfectum holocaustum consummatæ charitatis; Deo, uni, trino, consecraverunt.

His actibus **Heroicarum virtutum**; **Sancti Henrici, Ludovici, Ferdinandi, Eduardi, Stephani, Hermenigildi, Casimiri**, omnes invictissimi, ac **Christianissimi Imperatores, Reges, Principes Ecclesiæ militantis**, magnâ

gratiâ Christi, qui dat victoriam roborati, in Bello Sacro, legitimè certantes, usque in finem, de omnibus Dei & Christi JESU inimicis, triumphaverunt: & ideo à Rege Gloriæ, justitiæ coronam receperunt in Regno Dei.

His actibus Christianæ charitatis, pietatis, magnanimitatis, cursum consummemus, fidem servemus, Dei gratia, sine qua nihil possumus, roborante infirmitatem nostram; & cum illâ legitimè certantes: tantis Exemplis Sanctorum Apostolorum, Martyrum Virginum, Regum, Procerum & militum Christianorum, qui nos ad hoc Bellum Sacrum præcesserunt; & sine intermissione adhortantur, sic animum, & accendamus; ut imitari non pigeat, quod celebrare delectat; sed eorum incitemur factis hæroïcis, quorum gloriamur triumphis. Sic certando, Dux Belli Sacri, Rex Regum, Christus Deus noster, victor omnium, per Crucem, semper vincet in nobis & nobiscum, qui semel vicit pro nobis.

Audiamus Apostolum JESU-

CHRISTI, debellatorem Gentium:
 „ Apparuit gratia & benignitas Salva-
 „ toris nostri Dei erudiens nos, ut
 „ abnegantes impietatem & sæcularia
 „ desideria, sobriè, justè, & piè viva-
 „ mus in hoc sæculo, expectantes
 „ beatam spem, & adventum gloriæ
 „ magni Dei, & Salvatoris nostri JE-
 „ SU-CHRISTI; qui dedit semet-
 „ ipsum pro nobis, ut nos redimeret
 „ ab omni iniquitate, & mundaret
 „ sibi populum acceptabilem, sectato-
 „ rem bonorum operum, *Tit. 2.*

Audiamus Principem Apostolo-
 rum, primum in terris Christi Vica-
 rium, & supremum totius Ecclesiæ
 militantis Ducem, omnes Christianos,
 Christi milites, ad Bellum Sacrum
 adhortantem: Magis satagite, ut per
 „ bona opera, certam vestram vocatio-
 „ nem & electionem faciatis: hoc enim
 „ facientes, non peccabitis aliquando:
 „ sic enim abundanter ministrabitur
 „ vobis introitus in æternum regnum
 „ Domini nostri, & Salvatoris JESU-
 „ CHRISTI. 2. *Can. Cap. 1.*
 Audiamus dilectum Discipulum,

quem diligebat **JESUS**; Quoniam, inquit, omne quod natum est ex Deo
 „ vincit mundum: & hæc est victoria,
 „ quæ vincit mundum fides nostra;
 „ quis est qui vincit mundum? nisi qui
 „ credit quoniam **JESUS** est Filius
 „ Dei. 1. *Joa.* 5.

Audiamus ipsum Verbum Increatum, & Incarnatum; quod erat in principio ab Æterno, Verbum quod erat apud Deum, Verbum Deum, per quod omnia facta sunt, & quod ipsum Caro factum est, & habitavit in nobis, conceptum de Spiritu Sancto, natum ex **MARIA** semper Immaculatâ, semper Virgine Dei Genitricæ: Quid dixit Verbum illud Caro factum? Quod Apostolis dixit, omnibus
 „ Christianis dicit: Exemplum dedi
 „ vobis, ut quemadmodum ego feci,
 „ ita & vos faciatis; non est servus melior Domino suo, si me persecuti sunt
 „ & vos persequentur; oportuit Christum pati, & ita intrare in gloriam
 „ suam. Regnum Cœlorum vim patitur, & violenti rapiunt illud; contendite intrare per angustam portam: in mundo pressuram habebitis;

¶ sed confidite ego vici mundum. Ecce ego vobiscum sum usque ad consummationem sæculi.

Denique hæc dicit Rex Regum Dominus dominantium, primogenitus mortuorum, victor omnium per Crucem, magnus Dux exercituum Dei vivi: Qui habet aurem audiat, Verbum glorificatum, hoc omnibus dicit: *Quis vicerit faciam illum sedere mecum in throno meo; sicut & ego vici, & sedeo cum Patre meo in throno ejus.*

Divina Trinitas, per JESUM, Deum-Hominem Salvatorem meum, & Virginem Dei Genitricem MARIAM, omnium electorum Matrem, in horâ mortis meæ, viatico Eucharistico, sic roboram me: ut te donante, omnia vincam; & te Deum, verum, vivum, unum, trinum, optimum, in Æternum, videam, diligam, possideam. Hæc fit tot laborum, expeditionum & præliorum merces magna nimis.

Hæc militiæ Christianæ clausula, ac consummatio: hæc generosorum Christi militum corona: hic esto felix exitus, atque optatissimus, Belli Sacri

FINIS.